



名家表選卷之七

狀元謝及第表

史真翁

黃屋臨軒肆頒清問卅墀唱第咸錫殊科茲為士子之榮

益顯文風之振中謝竊以真人御極聖學造微屈至尊而

延四方之豪謀正道而發千載之秘畧去細故招徠讜言

方驚大對之難酬敢意殊恩之普及伏念臣久蒙樂育濫

與觀光昧通經明道之方之為史綴文之識况禮樂之制

作何足以知賴 皇帝之憲章乃所願學謹誦語言於紙

上誤占英後之選中俾釋布韋悉加紳笏茲蓋伏遇 皇

帝陛下聖由天縱善與人同明詔賓興豈漫脩於故事斯

庭親策糞有得於竒才上勤旒扆之觀下采芻蕘之賤媿

無剗切例辱甄收臣等敢不思勵赤心愈堅素履淵源所
自幸親見聖人之爲師夙夜靡忘誓必以忠義而相勉

侍講說書官爲經筵進講孟子終篇謝賜金帶牙
簡同侍讀脩主官謝賜御筵及鞍馬香茶進詩表

史真翁

華光講藝備觀至聖之書遂省賜筵並錫多儀之寵感洪
恩而播詠瞻丹扆以颺言中謝竊以漢帝論經庠觀後賜
衣之渥唐宗嚮學瀛洲疏給膳之榮意皆寓於隆儒禮特
豐於接下矧軻書之妙旨傳孔道之正宗由義居仁七篇
之言靡不載垂憲詒後百世之王莫能違於穆熙朝若稽
不訓祖禹發明於元祐表臣敷繹於紹興建聖神尊德以

有爲於問學逢原而自得細旃畫訪聆責難陳善之規我
弁星環探知性盡心之蘊華編謂徹諛問奚禪疇侍言講
說之勞暨著記纂脩之職繆緝采復放象齒之珍玉牽
示慈威綴麟臺之席上駟式謂於沃轡團龍交繫於奇芬
稽古所無省躬莫稱歸美以報拜手載朝賀至聖之大成
述君臣之相說辭陳約禮遠希積翠之篇句寫賜箋俯效
集仙之歛退慙斐墨曷對閔休茲蓋伏遇 皇帝陛下居
安資深守約施博覽大賢之論集興盛治之雍熙德醉從
容秩太清之華燕將鳥奕邁崇政之彝文大臣等職媿寤
疑恩霑同樂讀古書而尚友諒懷望道之思頌清廟以致
平期盡事君之義

生日謝禮物表

史真翁

一人盛治正欣仁壽之同躋八表衰踪亦荷康寧之敷錫
敢期睿藻遠賚慶儀奉內府之珍奇激中局之感佩謝伏
念臣起身寒素遭世聖明依乘偶會於風雲遇合適符於
魚水力未施於橫草位遽底於面槐雖景逼桑榆獲遂掛
冠之請而眷深簪履每興當宁之思時蒙親札之丁寧歲
有生朝之賜予矧今厚意復示殊恩貂璫飛鞚於川塗翰
墨騰光於龍鳳謂臣浮生之稀有又過十春祝臣暮齒之
再延俾逢千歲杯盤羅列盆盎錯陳率皆粟縷於兼金況
乃環裝於百寶分上方之清馥撥正焙之龍芽顧惟窮陋
之居易稱便藩之寵茲蓋伏遇 皇帝陛下乾坤長養爰

母愛憐自執卷於潛藩暨秉鈞於初政撫存特異終始弗
渝稽古無功已媿於輜車乘馬偷閑絕望載新於龍勺彝
尊臣敢不銘刻肺腑精虔香火誓殫微悃祈歸美於升常
尚覲餘生觀凝勳於萬一臣感荷天恩不勝激切之至

知隆興府到任謝表

吳永叔

起廢寓里疏榮价藩臣罪積如丘山聖恩深於雨露恭惟
皇帝陛下法度堯禹典則舜文數引公卿欲聞四方有水
旱盜賊之奏親問守相要使庶民無歎息愁恨之聲豈應
一介臣之微輟冒二千石之寄伏念臣學迂而僻志廣而
踈居官無以逾人任郡率多廢事雖衆女望蛾眉而交疾
寔小人負乘器以招尤特荷 陛下知非臣辜復以郡起

式欽乃命爰疾其驅臣所領州房臣常閱漢輿圖數唐職
貢或治南昌賜侯王之印或分西道專採訪之權雖曰地
雄亦因人重陳仲舉設孺子一榻清譽高於岱嵩王弘仲
得文正片碑靈光射於牛斗逮我聖宋懿我孝宗升潛藩
爲統府之華表賜額用紀元之號首振吏治以開中興今
天子聖明朝廷寬大乃眷王龍之散吏就交銅虎之左符
臣已於某月日到府上訖謹宣鴻化式慰黔黎紫馬朱衣
雖動千里湖山之色玉珂金鑰尚思五更京闕之朝

謝除吏部尚書兼翰林承旨表

周益公

頻年入侍徧歷清近之班兩職並陞復冒殊尤之寵音服
童於朽質被羈策於名駒異渥鼎來危衷震惕中謝伏聞

漢以尚書爲喉舌唐以翰苑爲腹心明光畫省之嚴夔龍
接武洛殿金鑾之邃頗牧在中凡遇遷掄已爲要劇矧疊
膺於組綬足增耀於簪紳如臣者天分弗高人才甚下自
惟始願不踰州縣之間誰意晚途凌躡賢豪之上揆分數
祈於罷免疏榮更誤於褒遷冠秩序於南宮進班聯於東
閣胡瞻鵠特久慙受祿之無功兼得熊魚彌媿舍生而取
義二儀施大介命輕此蓋伏遇 皇帝陛下文武生知
聖神廣運使人也噐隨良祿以無遺與物爲春舉根莖而
畢遂是容賤士仍玷高明惟聖朝法令之具存初不勞於
裁覽而明主德功之俱懋亦何待於論思第當守三尺以
不欺且復盡一心而無隱庶持孤節仰報鴻私

謝除禮部尚書兼翰林學士表

周益公

宗伯綴文昌之坐已高曳履之班翰林依華蓋之星尚玷演綸之直當聖主謹持於公器獨愚臣常媿於私人中謝瞻城南尺五之天致身無路想玉階方寸之地通籍幾年況乎出入禁嚴周旋侍從論思獻納日邇清光衣被服成歲叨微數向匪負一時之望安能符衆論之公如臣者學不足以知方才不足以應務家僻四立甘爲窮陋之民君門九重敢起躋攀之念忽拜便蕃之命疊加優異之恩帥屬春官光貳卿之舊次摘文禁苑奉四命之新榮煥寶帶以章身飭繡鞵而駑駿正使實兼數器尚虞稱塞之難矧伊初乏寸長何意超踰之甚周章就列俯仰懷慙此蓋伏

遇 皇帝陛下道叶舜華志恢禹迹明明在下雖洞照於群情浩浩其天每包涵於萬類寧稍捐於爵秩恐或棄於非對遂致凡才亦塵顯仕臣敢不悉其思慮稱是寵褒號令文章期助漢家之制討論潤色勉希鄭國之賢苟違素食豈酬洪造

中書舍人謝除翰林學士表

周益公

鳳掖演綸文俟黜幽之典鑿坡裁詔誤叨傑直之榮拜命周章捫心媿汗臣中謝伏以禹謨舜典周誥商盤德意具孚雖本帝王之惻怛訓詞播告亦須臣下之討論惟坦然明白於一心故粲若傳流于萬世矧惟聖代丕振文明承明著作之庭畢來俊彥金馬玉堂之士尤慎選掄宜得名

儒專承內命如臣者斷無他技累有至愚粗知前事之可
師每嘆小才之難強螢窓夜學燭莫望於金蓮蓬戶久居
班豈知於玉筍奮身一第糊口四方叨逢盛世之旁求獲
與群賢而並鷺驟離粵溲服在高華潤色非長悵已窮於
薄技論思莫效居有負於厚恩切幸保全敢希進擢豈謂
忽從四戶躡真北門以荒蕪之學而備顧問於禁林以飢
餒之文而助發揮於睿藻龍蹕至矣懼亦隨之此蓋伏遇
皇帝陛下聖以日躋智由天錫垂拱視民之阜始終典學
之脩孔子多能集大成而自得高皇善任屈群策以無遺
遂致採葑俯令視草臣敢不告謀猷于后以聖王爲師聽
漢詔於山東少補中興之治布堯言於天下庶無內相之

慙臣無任

謝除太府少卿表

周益公

將命江淮久塵星省疏榮觀闕驟亞月卿念委寄之不移
知思恩之愈厚臣中謝伏念寒鄉晚出薄宦卑飛叨逢籲
俊之秋濫綴登畿之數粵負乘於外府旋列屬於中臺所
懼汰歸乃膺臨遣給餉坐兼於兩路空餐行及於再朞自
量心計之非長常恐使華之不稱竊稽往籍具有前模流
馬木牛葛亮創蜀中之運輦車驪駕寇恂資河內之軍彼
皆值於行師尚不聞於乏事矧脫劍橐弓之後無飛芻輓
粟之勤第鈞考於簿書粗幹旋於金穀論功何有竊位則
多已慚假寵於諸郎更許參華於七寺中負梁鶻之刺徒

驚晉馬之蕃此蓋伏遇 皇帝陛下大智博臨深仁徧覆
灼知能否故雖遠而不遺方勸事功凡有長而必錄爰茂
出綸之渥悉褒總賦之臣遂致下愚亦升少列臣敢不仰
承睿眷俯竭駑才無廢前勞少助足食足兵之政更圖後
效永堅惟忠惟孝之心

謝吏部侍郎表

周益公

嚴近叨居夙負瘵官之責武文迭試更膺換部之榮襲衣
頒在竒之珍寶帶錫章身之寵仰慙主眷俯愧輿言中謝
臣聞古之銓綜存乎人今之銓綜一於法存乎人固可以
得士然其弊也嘗由予奪之不公一於法固可以減私然
其弊也或致賢愚之同滯而況簿書紛若胥史雜然苟稽

察之弗精將混淆而莫辯欲酌古今之中制當令人法之
並行庶稍戢於吏姦亦少伸於士氣豈容虛受以累明揚
伏念臣性鄙習迂志卑才下早親翰墨第爲書生陳腐之
談久侍軒墀初乏禁從論思之語引去則殊私之未報欲
留則高位之難安方進退之靡寧忽選除之下逮肺腑抱
履冰之懼面顏形撻市之羞被此光靈若爲稱塞茲蓋伏
遇 皇帝陛下乾行不息日照無私知人非堯帝之難巧
任奚患選衆有臯陶之舉枉直自分夫何一介之臣乃冠
貳卿之列臣敢不遵承法令振拔滯淹雖微冰鑑之明上
裨睿哲誓守權衡之信仰助公平苟不辱知斯爲報國

謝除禮部侍郎表

周益公

掌秘府之圖書久玷英遊之列奉甘泉之筆素驟汗法從
之班恩厚踰涯感深次骨中謝臣聞知人繇乎堯哲公職
著於周官明三德以有家所以撫五振而凝庶績佐六卿
而率屬所以倡九牧而阜兆民何畏巧言其惟吉士如臣
者以一介甚踈之跡荷兩朝特達之知槐市蓬山早塵華
選烏臺鸞掖浸陟要班洎中返於江湖亦旋歸於覲闕踰
年于此片善莫聞心蹶措以不安顏忸怩而罔措所期顯
黜乃誤殊遷惟宗伯古之清曹惟貳卿今之撫仕禮樂自
天子出雖上稟於聖謨邊豆則有司存當俯求於故實夫
何鄙朴而許攝承夙夜直哉惟清莫遂夔龍之選文章煥
馬可述更慙乘馬之王茲蓋伏遇 皇帝陛下冠古聰明

御圖勤儉辯臣鄰之邪正昭示抑揚閔風俗之墮偷力加
勸沮知臣雖無可用之實察臣粗有不欺之愚特假寵榮
俾陪亞旅臣敢不益堅素守更厲丹心效守職之小忠詎
塞論思之責竭事君之大節或酬覆幬之仁

生皇孫賀壽皇表

周益公

有天下而傳之子初微黃屋之心受帝祉而施于孫俶誕
青宮之胄慶均五殿喜浹黃邦中賀臣聞瓊幹分輝率由
於本固銀潢演潤蓋自於源深繫今日之蕃昌乃異時之
積累世世脩德則儲有羨之休親親仁民則享無窮之樂
成哉豐報備此燕居恭惟 陛下道極際蟠心游坤淡縣
本支於百世延壽考於萬年仙李盤根笑唐基之未大猗

蘭奕葉掩漢事而有光臣幸值邦榮屬分閫寄南宮北內
想胥治於宸歡左城右平悵莫陪於班賀

降誕皇子賀皇帝表

周益公

高煤錫羨長嫡挺生列聖儲休三宮交賀中賀臣聞德如
堯帝祝多子於封人聖若文王詠百男於詩雅厥今盛事
與昔同符恭惟陛下纂國丕基受天休命當藝祖肇邦
之歲暨統元更曆之春是開蒼震之祥於赫炎圖之永臣
屏居農畝遙睇闕庭胥同四表之歡仰賴一人之慶

元正慰表

周益公

行夏時而正曆荐易歲華履春露以念親益昭聖德凡預
載持之數共懷怵惕之思中慰共惟陛下以大孝而顯

揚任妙之徽音以至尊而度越冬寒之高行當萬國貞珍
之在列嘆東朝靈几之方新佩響唐宮莫展壽觴之禮鐘
鳴漢殿暫停元會之儀願寬追遠之心茂對履端之序臣
猥將隆指不獲躬詣東上閣門

冬至慰表

周益公

化國日舒徐行北陸聖人孝至永念東朝凡在輿情同深
孺慕中慰共惟陛下德隆天性報厚母慈當宮線之初
添悵禕衣之浸遠率百官而為壽忍虛興慶之彝儀辛舊
宅而會冬益愴永平之故事願抑對時之感俯安率土之
心臣無任

冬至慰表

周益公

望雲氣於觀臺甫驗新陽之至斷鐘殷於長樂莫陳亞歲
之儀上切哀恫下均感慕中慰共惟陛下行高文帝孝
邁有虞誦凱風聖善之詩悵六駝之未隔當化日舒長之
候視一線以增悲仰祈宸抱之少寬式副天心之來復
同前
周益公

浙東提舉到任謝表

朱仲晦

亞歲甫臨方講漢儀之舊徽音寢遠共深文母之思遙知
粹穆之光正切哀恫之慕中慰共惟陛下道同堯舜行
過淵騫罷長樂之壽觴深悲節物望慈寧之總帳益動孝
思願寬追遠之懷庶對履長之序
擢於偏壘付以外臺便道造朝單車詣部延見父老問其

疾苦之由宣布詔書諭以丁癯之意榮踰望表懼溢情涯
中謝伏念臣生長田間棲遲林壑居然朴拙見謂迂踈潛

心切慕於師承行已敢干於義命會逢聖日參預時流驟
自草萊起分符竹乾坤大德施且不貲螻蟻私情報於何
有屬歎歲民無艱食謂愚臣職有微勞寵之冊府之華昇
以近畿之節雖駑馬之十駕後者鞭之然鼯鼠之五窮技
止此耳毋乃累公朝之選重以為多士之羞茲蓋伏遇

皇帝陛下闢舜四門馭周八柄欲尺寸之長並用致辱微
之末亦收比奉對揚親叨臨遣大明委照不棄負薪之言
零露䟽恩更下賜緡之令顧愛所在稱塞為難臣惟當恪
意講求因時施舍不能則止戒小已之便文當官而行慕

古人之報國庶殫毫末上答丘山

南康軍到任謝表

朱仲晦

迂愚無用久陪香火之班臨照不遺驟假兵民之寄懇辭弗獲宣布云初感激涕零媿深汗浹中謝伏念臣受材凡近賦性顛蒙徒能讀古人之書夫豈識當世之務頃蒙登進獲奉清閑繼迹於丘樊遂閱歲華之久顧馳心於魏闕敢忘葵藿之誠中兩奉於除書亦屢祗於名節銜衰抱病既莫效於驅馳假寵疏榮反謬膺於眷獎方誓堅於素守庶少答於殊知豈意因仍復階任使論資校考既已極於超踰揣分量能懼愈難於稱塞矧自乖於夙志又仰負於前恩雖嘗控瀝而莫回終坐懦庸之無守遂扶衰朽暫

別故山已見吏民具宣德意豈曰昨非而今是實繇義重而身輕此蓋伏遇 皇帝陛下性得堯仁道高舜哲念安民之不易故慮充軫於遠方謂知人爲甚難故用或收於棄物致茲屑瑣亦備使令臣敢不仰奉詔條俯詢民瘼倘粗聞於疾疢詎辭撫字之勞冀少假於旬時卒上退藏之請尚全末路克對寵光

潭州到任謝表

朱仲晦

衰病卧家不堪驅使誤恩分闔重玷選掄雖屢控於懇辭顧曲勤於褒諭寵榮實異感懼難勝亟扶曳以就途已文持而視事中謝伏念臣迂踈末學災患餘生得陪香火之班豈復冠紳之念海瀕收養尚媿強顏嶺表藩宣幸蒙反

汗豈期巨屏游拜明綸昔獨避禮樂之華令專展詩書之
試況學兼嶽麓脩明遠自於前賢而壤帶洞庭鎮拊近煩
於元老俾承二任孰稱萬分豈惟冒辭遠就近之嫌抑恐
爲知人安民之累雖欲量能而易地自知無力以回天勉
見吏民具宣威德茲蓋伏遇 皇帝陛下文明出治仁孝
保邦四方無虞允軫一夫之不獲九德咸事尚憂片善之
或遺謂臣有討古之勤以臣懷澤物之志假之師帥之職
責以治教之功臣敢不仰佩訓辭俯殫學力雖馳驅靡及
唯知趨事之誠或黽勉不前願遂歸田之請

致仕謝表

朱仲晦

投閑置散方疑宿負之未償引戶校年忽慶湛恩之純被

適符忱請遂沐殊私揖杖知榮戀軒增慨中謝伏念臣聖
朝賤士幽谷鄙生自審凡才每抱遺經而未嘆人嗤僻學
雖逢聖日以何施乃誤選掄過叨任使然計出藩而入侍
善無毫髮之稱獨聞倡僞以黨姦罪有丘山之積果煩清
議卒抵大呵幸夙簡於皇明得下從於輕典迹已安於毗
里祿猶寄於朝班出入三年未能寡過周旋再赦亦既蒙
恩沆臻告老之期亟決歸田之計尚意拘縻於謫籍豈容
遂休佚之懷暨聞播告於臺評方喜有允俞之望本原所
自會幸何多茲蓋伏遇 皇帝陛下神聖自天文明周物
當彼忠佞交擊之際既皆判別而不疑逮其精華欲竭之
時一與休息而無間智仁兼盡威德並流豈但一夫獨爲

私幸臣敢不仰潛至教益厲初心慍歲月之無多雖已不堪於把玩悵淵冰之未免獨何敢怠於戰兢誓畢餘生仰酬大化

落秘閣脩撰依前官謝表

朱仲晦

彈文上徹已幸免於嚴誅詔墨下頒復寵加於明訓閱時既久祇命新感極涕零懼深首隕中謝伏念臣草茅賤士章句腐儒惟知僞學之傳豈適明時之用頃叨任使已屢奏於罔功旋即便安復未能於寡過致煩重劾盡荷宿愆謂其習魔外之妖言復巾屨之汗行有母而嘗小人之食可驗恩衰爲臣而高不事之心足明禮闕以致私故人

之財而納其尼女規學官之地而改爲僧坊諒皆考實以非巫文使竄投而奚憾不虞因貸乃誤保全第令少避於清班尚許仍居於散秩憇齋書之來下恍歲律之還周視要囚詎止於旬時蓋存遷就速數惡難從於未減猶聽省循口誦以還心銘敢墜此蓋伏遇皇帝陛下仁兼覆載明極照臨作福作威總大權而在已曰賢曰佞付公論於得人謂罰刑固足以懲姦而捕告豈容於匿指式敷顯號徧警且察臣敢不深省昨非細尋今是年齡晚雖悲後效之無期肝膽輪囷尚喜孤忠之有在誓堅死守覬答生成臣無任

落職罷官祠謝表

朱仲晦

罪多擢髮分甘兩觀之誅量極包荒姑示片言之貶速復

尋於白簡始知麗於丹書鑄延閣論議之名輟真祠香火
之奉茲爲輕典允賴洪私捧戴奚勝感德因踰中謝伏念
臣草茅賤品江海孤生蚤值明時已誤一初之眷獎晚逢
興運復叨上聖之深知召自藩維擢參帷幄畧無可紀足
稱所蒙暨遠去於朝行卽永歸於農畝然猶賦之佚祿使
庇身於上祝之間實在清流容厠迹於圖書之府所宜恭
恪或追悔尤乃弗謹於彝章致自投於寬網果煩臺劾盡
發陰私上清宸嚴交駭聞聽凡厥大譴大訶之日已皆不
忠不孝之科至於衆惡之交師亦乃群情之共棄而臣憤
眊初罔聞知及此省循甫深疑懼豈謂乾坤之造獨回日
月之光畧首從之常規既俾但書於簿罰稽青終之明訓

當許卒遂其餘生是宜哀涕之易零已覺大恩之難報此
蓋伏遇 皇帝陛下堯仁廣覆舜哲周知謂表正於萬邦
已極忠邪之判則曲全於一物未傷黜陟之公遂使真頑
獲逃竄殛臣敢不涵濡聖澤刻厲愚衷雖補過以脩身無
及桑榆之暮景然在家而憂國未忘葵藿之初心

辭免待制仍舊 允秘閣脩撰提舉南京鴻慶宮謝

表

朱仲晦

假寵過優居速冒榮之愧封章屢却退深留令之虞敢謂
天慈訖從人欲恩深莫報感極何言中謝 伏念臣早以迂
儒濫塵官簿晚逢興運誤簡淵衷首頒召節之光華促侍
經幃之清燕趨箱待對復過借於寵光挾策陳詞竟何裨

於帝學旋奉閣勞之詔適諧退處之私雖竊便安甫深依戀第顧山林之遠迹難通禁闥之近班亟冒威顏存翰卑悃幸所陳之大義已孚於未拜之前故引避之微誠得遂於終辭之後然匪聖神之洞照敢期苟陋之曲全而況內閣簡編未替兩朝之深眷舊邦香火有嚴四聖之真游足安垂盡之期允謂非常之遇此蓋伏遇 皇帝陛下仁涵萬有德奉三無謂臣於勸講之功雖無所就察臣所懇辭之意悉出於誠特畀俞旨使償本願臣敢不益堅素守仰稱鴻施景雖迫於桑榆力難報國身未填於溝壑詎敢忘君臣無任

謝除待制待講侑撰實錄表

朱仲晦

分閫南州愧茂一壘之補論經內閣恍驚二命之領畀史職以仍兼戴上身而愈重藏逃莫避跼躅靡容中謝竊以王求多聞是惟建事帝入西學于以上賢當始初清明之朝資朝夕論思之助作於心而關政事必求其原脩其身以及國家要知所本非精誠之有恪何論說之足云視孟軻之敬王始不負聖人之學為張禹之持祿始將貽天下之憂况薦紳之所難又載筆之為重顧頭白汗青之可誦豈槁項黃馘之能為念昔先臣嘗掌茲事正熙寧元豐之殺舛嚴於朱墨之分辨元祐紹聖之譏誣炳若丹青之著苟無家業曷踐世官情而居之吁可危矣伏念臣見聞甚狹才識非長開七袞之殘年荷三朝之異眷頃叨崇正之

選嘗獲遂於終辭茲玷邇英之聯覲莫從於素守此蓋伏
遇 皇帝陛下言稽往訓動法成模以緝熙光明之美而
佛時仔有以剛健篤實之資而日新其德念遺大投艱之
托推好善忘勢之勤借是孤蹤聿求多士講曾論一簞之
義敢竊企於師傅誦楚史八索之文庶無忘於規益

漳州到任謝表

朱仲晦

抱病支離莫副光華之遣封章懇切更叨選用之良引避
弗回兢惶失次卽強扶於枯朽已親見於耄倪仰戴恩威
俯深感懼伏念臣蚤由場屋獲廁縉紳惟自信其迂愚故
絕希於榮進中荷壽皇之深眷屢嘗收用而終許退藏晚
逢嗣聖之誤知亦既閱勞而復加任使凡此兩朝之殊遇

伊一介之能堪矧漳浦之名邦實甌閩之絕徼青衫捧
昔嘗粗習其土風白首分符今庶少安於此俗靜揣不
寸之分極知爲幸之多止蓋伏遇 皇帝陛下近法舜功
遠循堯道九德咸事尚且察片善之或遺四方無虞猶軫一
天之不獲肆曲收於棄物俾加惠於遠黎臣敢不深體皇
仁廣詢民瘼筋骸可勉豈忘盡瘁之勤疾疢或加未免告
歸之瀆尚繫覆壽卒遂生成

謝依所乞仍舊直寶文閣及賜詔書獎諭表

朱仲晦

白記上聞幸曲全於愚守璽封下逮庸特示於異恩祗服
以還戰兢無已中謝伏念臣學雖違俗意敢近名徒以迂
踈蚤絕榮途之望乃遭神聖晚深國士之知中少效於驅

馳竟靡聞於報稱及奉金華之召寧忘丹宸之忠顧惟塵
腐之淺聞莫副緝熙之隆指逮復退閑之秩乃降論議之
華寵雖荷於殊常義終慚於非據故上聖方臨於宸極而
微臣屢觸於天威自度孤危豈勝糜滅敢意出綸之渥有
嘉陳義之名幸引分之少安愧叨榮之愈甚茲蓋伏遇
皇帝陛下重明必照大度并容謂臣粗業詩書諒亦有聞
於古義憐臣稍知廉耻欲其無負於初心特屈憲章過形
褒勸臣敢不服膺至教邁迹前脩不忝不求何止終身之
誦是豈是訓庶幾有極之歸

代宰臣以下賀太上皇太上皇后尊號禮成表

朱仲晦

堯仁舜孝際授受之昌期地察天胡極形容於大冊四方
來賀萬福攸同中賀竊稽上聖傳序之符寔貫千載休嘉
之運纂圖儲禁日重光而月重輪眷志宸闡乾稱父而坤
稱母大矣承顏之慶温然歸美之誠雖蕩蕩無能名豈容
擬議而業業致其孝當盡顯揚於中禁之絲綸集曲臺之
弁冕金嚴玉振繼以淵衷璧合珠連煥為麗藻赫奕禮文
之備昭華容物之陳歷吉日而協靈辰肅將綽典斐英嚴
而騰茂實並受鴻名有識有知以呼以舞攬明皇之至道
如彼其卑考順宗之應乾冀能相尚有開盛典盡掩前聞
恭惟 尊號繼御不圖奉承慈極于帝其訓輯三統之睿
謨自天降康增兩宮之神茨肆上儀之具舉紛協氣以橫

流臣等幸列通僚欣逢昌會於虞階之獸舞合漢殿之嵩
呼資始資生既懋顯揚之報得言得壽永儲錫羨之祥

代提舉國史進神宗哲宗徽宗皇帝國史表

朱仲晦

二后在天軼鴻猷於今古百王冠德紀茂實於典謨爰勒
信書上于乙覽中謝竊以炎宋開萬年之祚裕陵發六葉
之祥丕顯哲宗於皇徽祖淵神心之相授煒聖烈之增光
載績武功疊西羌淳鄴之績稱秩元祀踵原廟丘澤之規
紛綸圖謀之符璀璨梯航之貢輯象髦而建學嗣養化源
憲六典以訓官世嚴朝者前揖商王之躅俯俾唐帝之蹤
運啓中興統承不緒南陽基命建武之元號重開東觀細
書大初之后闕不錄博延碩學論次舊聞迨繼照以龍飛

甫終編於麟獲視諸故府配五聖金匱之藏副在有司爲
千載石渠之鎮於斯爲盛業之與京恭惟尊號孝通神明
誠贊化育有典有則仰思祖武之繩記動記言下協孫謀
之燕搆諸琬琰炳若丹青臣職總編摩功懋潤色莫測乾
坤之蘊第輸鉛槧之勤述義農皇帝之書既垂成式由堯
舜文王之道願軫宸衷

代中書舍人謝表

朱仲晦

蒙恩承乏方懷曠職之憂拜命爲直學竊非才之媿寵榮
遽遠驚懼交增伏以三省之興實先朝之盛典西禁之任
尤當代之要津上潤色于訓詞下稽參于政理自非文章
絕妙可先諸子之鳴吏術精通能最群工之課則何以當

文臣之極仕備宰相之屬官如臣者地胄素寒資才尤慧
以童子雕蟲之技偶得科名用司空城旦之書當更州縣
比從柱後擢立螭頭閱歲月之推移之毫分之稱効惟虞
罷斥歸耕寂寞之濱豈謂遭逢入直禁嚴之地光增末路
望過初心此蓋伏遇 皇帝陛下在宥中區統和元氣上
則承周太妣求賢之意下則納召康公用士之言耆老畢
歸俊英咸事鑠錙滿庫未忘一割之鈔刀驂隸成群不棄
十駕之駑馬遂令拔擢爰及鈍頑臣敢不敬佩德音恪居
官守竭心思之逮及效耳目之聞知經宿進碑致效矜誇
於近世界年無草願希慎密於前人

代中書舍人謝上表

朱仲晦

左螭清近顏無咫尺之違右掖峻嚴言有絲綸之出皆一
時之妙選爲四海之尊觀承命震驚撫躬愧懼伏念臣縉
紳末胄淮海孤生弓必爲箕嘗奉父兄之教柄不量鑿莫
爲姻黨之容自亦笑其闕迂人或憐其狂直分甘常調望
絕顯途屬一聖之載營收群英而自助巍然大老皆歸圖
任之中最爾小才亦備兼收之數越從戎幕推預憲臺張
陳狂瞽之言屢瀆音聞之聽間嘗罷去旋復召還惟是七
年之間遂叨兩制之列而況訓詞之任政教所原除授不
當者得以論而封還指麾或慝者得以白而改正號爲要
地當慎選論豈伊鄙人所能堪克茲蓋伏遇 太皇太后
德配任妙道稽唐虞用楫以濟大川斷鼉而立四極雖節

儉正直在位若羔羊之時而思念憂勤進賢如卷耳之際
致令頑鈍誤辱寵靈臣敢不慎出王言審求國體非特脩
異日祖宗之事亦以信平生師友之謀報德未期悵念歲
時之晚捐軀有處敢懷家室之私

代賀元會表

朱仲晦

十二月為正前既稽於夏道二千石上壽仍參用於漢儀
盛日載逢壽竟且舉中賀伏惟 皇帝陛下財成天地參
並神明命義和之二官謹春秋之五始調和元氣撫御中
區肆屬春王之朝肇脩元會之禮雞人呼旦庭燎有光外
則虎賁羽林嚴宿衛之列內則謁者御史蕭班行之容漏
未盡而車輅陳蹕既鳴而鼓鐘作應龍高舉雲氣畢從北

極上臨星宿咸拱受四海之圖益相拜萬國之冠裳歲月日
時於焉先正敷名文物豁爾可觀邁康王鄴宮之朝揖高
帝長樂之事謁頌敷而並作鬱力如氣以橫流臣比遠天光
遽更年籥職拘藩國莫瞻龍袞之升心折宸居但想獸樽
之列

代倉部知黃州謝表

呂伯恭

提邊符而乘障愧非禦悔之材佩郡紱以長民莫稱承流
之寄撫躬跼蹐泣事凌兢中謝竊以群萬國之輿圖大一
王之統御地分遠邇之別政有先後之差繫牧守必得夫
循良則群黎庶底乎康乂瞻惟小壘介於長淮雖事簡而
俗醇實望輕而責重登覽故迹多名勝嘯詠之餘參攷前

明亦豪傑馳驅之舊肆求共理必東異能如臣者撲拙孤
蹤凋殘遺族冥心造化已絕意於紫青屈首簿書第研精
於朱墨偶濫塵於論薦遂誤昇於蕃宣自揣庸虛若爲稱
塞此蓋伏遇 皇帝陛下錫天勇智受命溥將日月光華
悉在照臨之下乾坤高厚咸歸覆燾之中凡茲銅虎之盼
亦謹玉關之戍曾何踈賤亦預選掄臣敢不宣布詔條輯
寧閭里挈鉞守噐誓力保於封陲毀瓦畫墁敢坐糜於廩
祿臣無任

代會部知池州謝表

呂伯恭

淮壖乘障初無固圉之功江表干城復玷承流之寄甫祗
職業參布詔條中謝伏念臣繆膺世賞之延濫綴官聯之

求投身冗散降命竒窮曩隨牒以戍邊適傳烽而做備當
戎馬之侵軼屢瀕至危賴王師之奮張卒獲自保偶逃龜
犢之毀復玷魚符之分矧池陽之奧區乃江表之重地干
戈載戢則必佩服包桑之戒兵農雜居則必洽比細柳之
屯匪時閔材疇荷隆委此蓋伏遇 皇帝陛下剛健中正
齊聖廣淵賜十行之書留神萬國考三載之績久任官師
自驚留落之蹤亦預使令之列臣敢不悉循侯度祗若政
經輯寧凋瘵之餘咨度弛張之要道上德意如瞻咫尺之
光同衆戚休敢顧斗升之祿

代叔父知南康軍謝表

呂伯恭

職方之籍甫列附庸公軍之章乃容專達恩既均於錫土

誠後敢於籲天中謝惟領下之小邦實江西之窮處庶傳
據南北之會廩稍積前後之增民力凋殘無以追隨他郡
地望卑薄不足搖動有司既弗克勝復難自懇秩居人後
憂在衆先如臣者殼迹至微技能甚短折肱州縣雖險阻
之少嘗屈首簿書顧神明之已耗晚推遷於官牒誤畀付
於守符若爲拊摩以稱臨遣此蓋伏遇 皇帝陛下敷施
鴻化不冒上仁視邦選侯方旁求於召杜考圖數貢亦罔
間於邾滕凡有識知同歸首禱臣敢不布宜詔令遵奉教
條尺寸之膚護養何裨於大體斗升之水涵濡終覲於餘
波臣無任

代舅曾史君知筠州謝表

呂伯恭

九畿星拱並受詔條萬乘天臨誕敷宸指雖陋邦之代置
亦德意之親承具以聖謨告于裔土中謝竊以舜門穆穆
輯瑞以朝諸侯湯網恢恢受球而綴下國思皇盛旦率履
舊章肆勤前席之咨溥及左符之寄腹心屏翰臂指豪英
凡拜賜於朱轡咸觀光於丹旆如臣者至謏而拙甚愚以
疎弓箕久負於家傳簪笏偶逃於官謗長江右壤筠水附
城盼竹使以承流已過斗升之量款楓宸而錫對辛瞻咫
尺之顏此蓋伏遇 皇帝陛下濬哲文明剛健中正下天
上施酌民瘼以廣求小紀大綱收主威而總攬邈在河山
之外皆如廉陛之前臣敢不遵奉章程慰安黎庶惇行教
化漸消珥筆之風恪守部封少効挈鉞之智

代舅曾史君知廣德軍謝表

呂伯恭

屬精之朝嚴於置守坦明之訓飭以臨民佩天語以在塗
參土風而問俗中謝竊以大江之右一障甚微行闕之旁
九畿莫近地輕而責重賦寡而費多指日待糧皆尺籍伍
符之舊無時致餽當大車駟馬之衝紛罷遣之相仍凜支
持之不暇誰與領此厥惟艱哉如臣者受性顛蒙降材謏
薄東西隨牒飽郵傳之風霜日暮坐曹老簿書之歲月豈
期末路驟試小邦茲蓋伏遇 皇帝陛下齊聖廣淵剛健
中正輪運輻集合華夏以來主綱舉網踈總方維而受職
矧在封圻之內實同廉陛之前臣敢不遵奉詔條慰安閭
里挈竝假器誓殫守邑之勤毀瓦畫墁少答食功之義

代倉部知吉州謝表

呂伯恭

竢罪倉曹無裨邦計分憂江國尚玷蕃條丁寧臨遣之榮
怵惕拊摩之責庀官甫始拊已載兢中謝維是廬陵介於
楚甸土膏而人瘠物夥而俗貧萬室連薨剽奪時鳴於桴
鼓千艘銜尾轉輸日困於舳艫匪時通材疇荷隆委如臣
者賦資謏薄涉世闊踈兩郡民編茂矣慰安之效二年省
掾居然尸素之慚亟求襍被之行復與剖符之寄力綿識
眊責重事叢惟仰恃於乾坤或俯資於塵露茲蓋伏遇

皇帝陛下配天立極繼聖御圖恢舉閎摹網在綱而不紊
操持大柄臂使指而必從雖遠在於江湖猶近臨於軒陛
臣敢不布宣詔令懷輯里閭急効近功忍自謀於寵利深

根固本誓勉盡於拙誠

為虞丞相作辭冊寶進封增邑表

呂伯恭

至德要道煥丕冊於賁文厚賞薄功下昕廷之渙汗忱辭
既貢淵聽尚高中謝竊以尊親者禮之隆養志者孝之實
雖百王之未舉用以揚名必萬物之咸和始為錫類將增
光於鴻業當諉屬於近司如臣之愚受責宜最所憂吁咈
督熙載之庶尤敢意寵嘉錄相儀之微効矧命秩建邦之
異數非疇勞懋賞之常科伏望 皇帝陛下稽用邦彝惠
綏人欲謂奉承慈極不專典章容物之間則期望弼臣豈
止宿贊擯承之末亟收還於前詔以飭厲於後勳再用控
誠迄期得請

為梁參政作辭冊寶補官表

呂伯恭

奏牘升闈屢十聰聽詔函寵命尚闕俞音輒忘難犯之威
敢述終辭之義中謝伏念臣志雖許國材不逮人高位難
居久弗勝於指顧厚恩未報如少緩於乞身若繇慶典之
成重拜明綸之渥既躡崇秩復荒大邦則異時避寵之言
皆為虛語平日惡盈之戒自負初心苟必強之受而納之
貪孰若聽其辭而全其守伏望 皇帝陛下俯矜懇款深
體精誠察其累疏之陳非敢月詞之飭九關霄漢儻籲告
之莫通一舸江湖將歸休之繼請

為虞丞相作辭郊恩表

呂伯恭

泰時均釐澤覃無外路朝敷命寵及罔功不勝墜谷之憂

敬致循牆之請中謝竊以大臣之義固非飭小節以為廉
國典之常亦難徇一夫而違衆既郊而賚於古有稽敢為
喋喋之忱辭將貢惓惓之愚慮為臣不易當翼厥后以思
難惟天無親實監有邦之敬德儻自安於居寵斯大戾於
協恭伏望 皇帝陛下寅畏以答天休隆寬以從人欲與
其盡循故事為邦家焜耀之光孰若少抑近司示君臣兢
懼之實庶或上助持盈之治豈徒私逃招損之危

為梁參政作辭郊恩表

呂伯恭

天命匪解載儲滋至之休地道無成彌懼大來之福敢辭
屢瀆尚冀終從中謝伏念臣久以瑣材辱於宰枋內積食
浮之愧豈獨危身仰思覆餗之憂將難報國於昭明祀克

相盛時顛若顯承皆群工之祗肅穆然昭優本上聖之寅
恭顧慙老臣曾何報效迺颺渙汗之號迺增湯沐之封誠
悃雖殫俞音尚闕伏望 皇帝陛下俯矜拙守博采師言
紓其負乘之慚裁此告廷之渥雖多邑不惜固仲尼愛繁
纓之心然定欲故亡亦晏嬰辭邢殿之義

為芮直講作慶王生皇孫錫名謝太上皇帝表

呂伯恭

列第環官方極奉承之樂周廬設衛載延似續之榮鳥奕
觀瞻凌兢佩戴中謝竊以東平諸子印符限於能趨魯國
五名類僅稱於同物疇若覃龐恩於襁褓矧惟錫美稱於
冕旒此蓋伏遇 太上皇帝陛下高視穆清游心昭曠巍

魏湯湯共瞻太極之尊繼繼承承爰篤曾孫之慶願弼成
於幼學用克對於鴻私

為韓尚書作知建寧府謝表

呂伯恭

輔郡罔功方籲天而瀝懇潛涵非據乃易地以疏恩優假
至深凌兢曷已中謝伏念臣舊繇平進親受異知參言語
侍從之流遭逢厚甚責大獻納誦思之効稱塞缺然假寵清
廂分憂近旬撫摩無術幸及於食新全度有加訖蒙於念
舊惟建溪之作屏實代邸之慈封屬此巧闕眷焉改畀官
游未遠驅馳尚記於壯時民心已殫凋瘵頓殊於前日姑
勉圖於綜理恐終負於便令此蓋伏遇 皇帝陛下明燭
萬微惠綏群獻本末輕重感師統御之中小大短長不出

範圍之外顧如衰鈍亦獲便安臣敢不上體曲成益思盡
瘁土風里俗雖粗識甘二三王澤國章曷布宣於萬一

Large stylized watermark or seal, possibly containing the characters '國' (Country) and '印' (Seal/Stamp).

Vertical columns of handwritten text in a cursive script, likely Chinese characters, located on the right page of the document.

